

## دور زوايا

قبل ما تحكم شوف من عدة زوايا  
بتلاقي قصص فيها بتحكي حكايا  
تمعن بالقصة منيح و فكفك اسرار  
بتكشف المستور و بيطفوا الخبايا  
الشيب بمنظور البعض ختیار  
العمر نخر لب عظامه القوايا  
تجعيدة حفرت ع جبين دهر جار  
مجعلك نشف الايدين دابوا الخلايا  
ناس بتشوف المنظر بغير منظار  
بتحكم بعقل ومنطق مش بالنوايا  
بتشوفوا حكمة ومعرفة وشيبة وقار  
جبلها الدهر خبره عجنها البلايا  
خبزها العمر تجارب من دون نار  
شعت نور ساطع يخرق المرايا  
البنيت بالفطرة حلاها ملفت الانظار  
بنظرات مختلفة نحكي الصبايا  
شهوة جسد ما بيغمض الها اشفار  
نعبي العينتين وزر و خطايا  
ونظرة قلب صافي ما حمل اوزار  
بالعين شافها ست واخت وام البرايا  
سلاح جندي ورصاص بيخوف كتار  
جريمة وقتل و نار وشظايا  
وعين تشوفه دم عالكف ع خط نار  
حامي الارض والعرض وحدود السرايا  
الحقيقه نسمعها منرويها بعدة اخبار  
المستور منها كتير بيوازي العرايا  
وكرمال تعرف منها الوجهين امرار  
وحبيت الحقيقة شي يوم تختار  
اعمل زووم ودور بالزوايا  
خضر خليفة